

MOEA O HALALELANG

Lenane-thuto

Notes —

KAROLO #1:

- I. Selelekela.
- II. Botho le Boteng ba Moea o Halalelang:
 - A. Boleng ba Moea o Halalelang.
 - B. Semelo sa Moea o Halalelang.

KAROLO #2:

- II. Botho le Boteng ba Moea o Halalelang. (nts'etso-pele.)
 - C. Mosebetsi oa Moea o Halalelang.

KAROLO #3:

- II. Botho le Boteng ba Moea o Halalelang. (nts'etso-pele.)
 - C. Mosebetsi oa Moea o Halalelang.

KAROLO #4:

- III. Matla a Moea o Halalelang:
 - A. Selelekela sa Matla a Moea.
 - B. Matla a Moea oo a ho kae? Nka ba le boitsebelo ba matla a joang?

KAROLO #5:

- III. Matla a Moea o Halalelang: (nts'etso-pele.)
 - C. Matla aa a molemong oa eng?
Tlhahlobo.

MOEA O HALALELANG

Notes

Tlhahlobo

Lipotso tse ka lebelloang, limaraka li 20

- 1) Khetha mabitso a mararo a sebelisoang ho hlalosa Moea o Halalelang (maq. 226, 227).
- 2) Ts'ehetsa taba ea hore Moea o Halalelang ke Motho, e seng matla kapa ts'ususmetso feela e se nang botho (leq. 232, 233).
- 3) Hlalosa mosebetsi oa Moea o Halalelang tsoalong ea Bobeli (maq. 235, 236).
- 4) Sebelisa Luk 11:5-13 ho hlalosa tse ling tsa lintlha tse malebana le ho fanoa ha Moea o Halalelang (maq. 254-256).
- 5) Matla a Moea o Halalelang a ho kae? U ka a amohela joang (leq. 260-265)?
- 6) Sepheo sa matla a Moea o Halalelang ke se fe (maq. 266-268)?

Lipotso tse ka lebelloang, limaraka li 10

- 1) Hobaneng ho le bohlokoa ho bitsa Moea o Halalelang, Moea o 'nots'i, oa 'nete o Halalelang (leq. 225)?
- 2) Bolela liphapano tse hlano tsa lebitso la Moea o Halalelang (leq. 225).
- 3) Bolela lipapiso tse 'ne tse hlalosang Moea o Halalelang (maq. 228-231).
- 4) Sebelisa Lengolo le le leng ho bonts'a hore Moea o Halalelang ke Molimo (leq. 231).
- 5) Sebelisa Lengolo le le leng ho bonts'a hore Moea o Halalelang o na le libopeho tsa bomolimo (Leq. 232).
- 6) Sebelisa Lengolo le le leng ho bonts'a karolo e nkoang ke Moea tsohong (leq. 237).
- 7) Hlalosa mosebetsi o le mong o khethehileng oa Moea o halalelang Testamenteng ea Khale (maq. 238-241).
- 8) Bolela likarolo tse fapaneng tsa tlolo/tlotso e matla ea Moea ho "ea tlang" (leq. 242).
- 9) Bonts'a kamoo tlolo ea Jesu e bonts'ang Boraro bo Teroneng ka teng kamor'a kolobetso ea Hae (leq. 247).
- 10) Hlalosa lentsoe la Segerike "**Dunamis**" (leq. 259).
- 11) Ke ho kae moo matla a qhomisang a sa fumanoeng (maq. 259)?
- 12) Fana ka Lengolo le le leng le hokahanyang matla a Moea o halalelang le mamello le nyakallo (leq. 266).

MOEA O HALALELANG

I. Selelekela.

Notes

A. Bohlokoa ba Moea o Halalelang (bala Gen 1:2; Jn 16:7; Ts'en 22:17).

1. Ho tloha pele ho tloleho ea lintho tsohle, ho isa nakong ea nyolohelo ea Jesu, ho ea fihla liphelehetsong tsa lefats'e, re bona bohlokoa ba Moea o Halalelang.
2. Mosebetsi oa Moea o Halalelang o bohlokoa hoo Jesu ka sebele sa Hae a reng ho tla ba molemo hore a tlosoe e le hore Moea o Halalelang a tle a tle.
3. Moea o Halalelang o bohlokoa joaloka Molimo hobane, Moea o Halalelang ke Molimo.

B. Lintlha tsa thuto ena.

1. Botho le boteng ba Moea o Halalelang.
 - a. Pele re tla ithuta ka Motho eo e leng Karolo ea Boraro bo Teroneng, ea tsejoang e le Moea o Halalelang. Re tla ithuta ka boleng le semelo sa Hae.
 - b. Ho feta moo, re tla ithuta ka Boteng ba Moea o Halalelang. Re tla shebana le mesebetsi ea Moea.
 - c. Litaba tse ngata thutong ena li amana le lithuto tsa Dr. J.R. Williams oa Regent University.¹ li sebelisitsoe ka tumello.
2. Matla a Moea O Halalelang.
 - a. Mona re tla shebana haholo le lentsoe la Segerike ho Liketso 1:8, **Dunamis**(matla).
 - 1) Jesu o ile a bolella barutuo ba hae ho emela Moea o Halalelang hobane, ha a tla ba tla amohela **Dunamis**.
 - 2) Ho tsoa lentsoeng lena, **Dunamis**, re fumana lentsoe “dynamite” (“dynamite” ke seqhoma kapa sehotetsi sa liqhoma, tseo hangata li sebelisoang bakeng sa ho thuo makhoara kapa ho senya).

MOEA O HALALELANG

Notes

- b. karolo ena ea thuto e arotsoe ha beli, ho ea ka lipotso tse peli tsa “matla a ts’ebetsong”.

- 1) Matla a ho kae?
- 2) Matla aa ke eng?

II. Botho le Boteng ba Moea o Halalelang.

A. Boleng ba Moea o Halalelang.

1. Lebitso la Hae.

a. Moea.

- 1) Moea ha se ntho e ts’oarehang, empa ke karolo ea ‘nete ea ho phela ha motho. E fapanyoa le:
 - a) Nama (Esa 31:3).
 - b) Nama le masapo (Luk 24:39).
- 2) Lentsoe lena **Moea** le supa bolokolohi ba motsamao le ketso (Bala 2 Bakr 3:17 le Johan 3:8).
- 3) E boetse e bonts’a matla, ts’usumetso, le motsamao o hlahisang phetoho (bala Gen 1:2 le Lik 2:2).

b. O Halalelang.

- 1) Mona re ba le maikutlo a ho khetholoha le khalalelo. Khalalelo e fapane le Tloaeleho. Hona le maikutlo a hlollang haholo a hokahanyoang le ho halalela.
 - a) Re boetse re bona maikutlo a “khanya” (Eks 15:11).
 - b) Khalalelo e boetse e bonts’a bohloeki.

MOEA O HALALELANG

c. Tlhakiso.

- 1) Ke Moea **O** Halalelang.
- 2) O khethehile. Ha ho Moea o Mong o halalelang.

2. Phapano ea Ts'ebeliso ea Lebitso la Hae.

a. Testamenteng e Ncha, **lebitso Moea o Halalelang**, le sebelisoa ka phapanyetsano le:

- 1) Moea (Luk 4:1, 2).
- 2) Moea oa Molimo (Math 12:28, 32).
- 3) Moea oa Krete (Bar 8:9).
- 4) Moea oa Ntate (bala Math 10:20 le Luk 12:12).

Ntlha ea Puisano

Ho ka thoeng ka Boraro Bo Teroneng mabapi le ts'ebeliso ee ea Lentsoe 'Moea o Halalelang'?

b. Testamenteng ea Khale, Lebitso Moea o Halalelang, le sebelisoa ka phapanyetsano le:

- 1) Moea oa Hau o Halalelang (bala Pes 51:11; Esa 63:10, 11).
- 2) Moea oa Ka/oa Hau/oa Hae (Gen 1:2; 6:3; Num 11:26; Pes 104:30; Job 34:14).
- 3) Moea oa Morena (ke eona e sebelisoang haholo).

Notes

—

MOEA O HALALELANG

Ntlha ea Puisano

Notes

Boleng ba kamano e pakeng tsa Molimo le Moea ke bo fe?

3. Mabitso a supang boemo ba hae.

a. Moea oa 'nete (bala Johan 14:16, 17; 15:26; le 16:13).

1) 'Nete ena e malebana le Jesu (Johan 14:26; 15:26; le 16:14, 15) 'Nete ke Mang (Johan 14:6).

2) 'Nete ena e phahametse tsebo ea lefats'e. E **ke ke ea amoheloa** ke lefats'e. (Johan 14:17). Hape bala 1 Bakr 2:14 malebana le ntlha ena.

b. Moea oa Khalalelo (bala Bar 1:4 le Bar 8:11).

1) Moea oa Khalalelo ke Moea o halaletsang molumeli.

2) Moea oa Khalalelo, o boetse ke Moea o motsosang bafung.

c. Moea oa bophelo (bala Bar 8:2; 2 Bakr 3:6; le Johan 6:63).

1) Molumeli o lokolloa litlamong tsa molao ka maikutlo a hore, hajoale o se a khona ho phetha "...se batloang ke molao" (Bar 8:4). O sa ka khona ho etsa sena hobane hona le ea kahare ho eena. (Bag 2:20) ea seng a phethile molao e sa le pele (Math 5:17).

2) Re lokolotsoe molaong hobane se re khona ho boloka molao. Re se re khona ho boloka molao hobane hajoale re khona ho tsamaea ka Moea (oa bophelo), e seng ka nama (Bar 8:4).

MOEA O HALALELANG

d. Moea o re etsang bana ba Molimo (bala Bar 8:15 le Bag 4:5, 6).

- 1) Re biletsoa ho ba karolo ea lelapa la Molimo. Kahoo, Moea o tla ho rona. ka mokhoa oona, o bitsoa Moea o re etsang bana.
- 2) Boleng ba boteng ba Moea o Halalelang ho rona, bo supa kamano e tebileng eo re seng re na le eona le Molimo hajoale. Ke Ntat'a rona (e leng seo puo ea Searame e se bonts'ang). Ka Moea oa Molimo, ha re be le kamano le Molimo feela, empa, ke kamano e tebileng, e matla, ea botho.

e. Moea oa Khauho (bala Bah 10:29).

- 1) Moea oa khauho, ke Moea o sa leng o sebetsa ka mohau pholohong ea rona.
- 2) O re biletsa le ho re atametsa mosebetsing oa Krete (Johan 16:7-15).

f. Moea oa Khanya (bala 1 Petr 4:14). Hona ka ho khetholoha, ho hokahanyoa le mats'oenyeho ka lebaka la Krete.

g. Moea o sa feleng (bala Bah 9:14).

- 1) Ha a na qalo ha a na qetello.
- 2) Moea o Halalelang o bitsoa Moea o sa feleng. O bitsoa Moea oa bophelo. Taba ena e lumellana le boleng ba Hae e le Moea o re etsang bana, kaha re bolelloa ho Johan 17:3 hore bophelo bo sa feleng ke ho tseba Molimo (tsebo e tebileng).

Ntlha ea Puisano

Bolela kamano e pakeng tsa mabitso a Moea o Halalelang le sebopeho sa Moea o Halalelang. Ka bokhuts'oane, bua ka kamano ena mabapi le sebopeho sa Molimo le Jesu Krete

Notes —

MOEA O HALALELANG

Notes

4. Lipapiso tse ling tse hlalosang Moea o Halalelang.

a. Moea o fokang.

- 1) Lentsoe la seheberu “ruach” le ka bolela “moea o fokang” kapa “moea oa bophelo”. Sheba Gen 1:2.
- 2) Lentsoe la Segerike “pneuma” le ka bolela “moea o fokang” kapa “moea oa bophelo”. Sheba ts’ebeliso ea lentsoe lena, e entsoeng habeli ho Johan 3:8.
- 3) Moea o Halalelang (o bapisoa le moea o fokang) o bonoa ka letsatsi la Pentekonta (Lik 2:2).
- 4) Lentsoe “ruach” le ka boetse la bolela “phefumoloho”.
 - a) Lemoha tlhaloso ea Moea e le phefumoloho ho Ese 37:5, 9.
 - b) Boela o shebe ts’ebeliso e ts’oanang ho Johan 20:22.
- 5) Litlhaloso tsena tsa mofuta oona, li shebane haholo le Moea o Halalelang e le matla kapa ts’usumetso ea bomolimo.

b. Mollo.

- 1) Khokahano e matla pakeng tsa Moea le mollo e bonoa ho Math 3:11 le Luk 3:16. Mollo o amana le taba ea ho timeletsa bobbe (Math 3:12; le Luk 3:17).
- 2) Ho Esa 4:4, 5, lemoha kamoo mollo oa kahlolo o fetohang mollo oa khanya ka teng.
- 3) Sheba meelelo ea lintlha tse fetileng o ikamahanya le Liketso 2:3, 4. Maleme a mollo a bonts’a matla a hloekisang a lentsoe le builoeng.

MOEA O HALALELANG

c. Metsi.

- 1) Papiso e ngoe ea Moea o Halalelang ke metsi a phallang. Hlokomela hore ha se metsi a emeng nqa e le ngoe (bala Johan 7:37-39; Johan 4:10, 14; Esa 44:2, 3 le Esa 32:15).
- 2) Mabapi le lintlha tsena tsa Moea, re ka boela ra sheba Esek 47:1-9; Sak 14:8; le Ts'en 22:1, 2.

d. Leeba.

- 1) Sets'oants'o se tlaoelehileng sa leeba se bonoa nakong eo Moea o theohelang ho Jesu joaloka leeba ka letsatsi la kolobetso (Luk 3:22).
- 2) Hona ho bonts'a bonolo ba leeba(Math 10:16).
- 3) E ka boetse ea bonts'a mosebetsi oa Moea oa ho fana ka bophelo.
 - a) Ho Gen 1:2, re bona Moea o foka le ho "oka-oka" joaloka nonyana holima boliba ba metsi ha Molimo a hlophisetsa ho tliša bophelo.
 - b) Noe o romela leeba. Le bonts'a bophelo bo khutlelang lefats'e.
- 4) Hape sheba ts'ebeliso ea leeba mabapi le sehlabelo.
 - a) Le ne le sebelisoa mahlabelong a Testamente ea Khale (Gen 15:9).
 - b) Re hopotsoa ka bonolo ba leeba le bonolo ba Mosebetsi oa Jesu (Math 12:20) le bolokolohi ba hae ba ho shoa (Esa 53:7).

Notes

—

MOEA O HALALELANG

Notes

5) Papiso e ngoe ea leeba e amana le topollo

- a) Ho ea ka moetlo oa Bajuda, ho tolokoa lentsoe la maebana-khoroana a ho Sefela-sa-Lifela 2:12, e le lentsoe la Moea o Halalelang bakeng sa topollo.
- b) Hopola hore mosebetsi oa Jesu oa topollo, o qalile kamor'a hore Moea o Halalelang o thehele holim'a Hae joaloka leeba.

e. Ho ts'oauoa.

- 1) Ho ts'oauoa ka Moea o Halalelang, ho bonts'a hore re bana ba Molimo ebile re sireletsoa ke Eena (bala Bae 1:13, 14 le Bae 4:30).
 - a) Ho ts'oauoa ho bonts'a hore ntho e itseng e ikarabella ho motho ea itseng ka botlalo. Moea o Halalelang o fuoa molumeli e le sesupo sa hore molumeli o ikarabella ho Molimo.
 - b) Moea o boetse o fanoa hape ho netefatsa ts'ireletso ea Molimo ho molumeli. Ho ts'oauoa ke sesupo sa ts'ireletseho ea motho (bala Ts'en 7:3).
- 2) Ho ts'oauoa ho boetse ho sebelisoa ho netefatsa kapa boikano.
 - a) Ho ts'oauoa e ka ba bopaki ba hore ntho e itseng e tla 'ne e be ea motho ea itseng le kamoso. Ke boikano.
 - b) Sheba ntlha ena o ipapisitse le 2 Bakr 1:22.
- 3) Ho ts'oauoa e ka ba sesupo sa bopaki kapa ho ikarabella moo ho itseng (bala Johan 6:27).
- 4) Ka lets'oao, Moea o Halalelang o sebetsa le molumeli ho supa bonnete kapa bopaki ba pholoho.

MOEA O HALALELANG

f. Ole.

- 1) Ole e hokahanyoa le Moea o Halalelang ho bolela kapa ho bonts'a tlolo kapa tlotso.
 - a) Hang kamor'a hore Moea o lule ho Jesu, O bua lipolelo tsena "Moea oa Morena...o ntlotselitse" (Luk 4:18).
 - b) Sheba 1 Johan 2:20, le 27 mabapi le Johan 14:26.
- 2) sheba 1 Sam 16:12,13).

Ntlha ea Puisano

A ko thuisse mats'oao a litlhaloso tsa Moea o Halalelang: moea o fokang, phfumoloho, mollo, leeba, metsi, lets'oao, le ole. Na u elelloa boteng ba Moea o Halalelang litemaneng tse ngata tsa Bibe, tseo o neng o sa li elelloe? Ho ka 'na ha etsahala hore e be ha re utloisise boteng ba Moea o Halalelang ka botebo Bibeleng le bophelong ba letsatsi ka leng.

B. Boleng ba Moea o Halalelang.

- 1 Moea o Halalelang ke Molimo.
 - a. Oona le boleng ba Bomolimo.
 - 1) Bukeng eohle ea Liketso, Moea o Halalelang o boleloa e Molimo (bala 15:28; 21:11; 28:25).
 - 2) Bala Liketso 5:3, 4. Lemoha kamoo Moea le Molimo li sebelisoang ka phapanyetsano ka teng (hape bala Math 12:31,32).
 - 3) Re tempele ea **Molimo** hobane **Moea o Halalelang** o lula ho ka rona (bala 1 Bakr 3:16).
 - 4) Ho boetse ho bohlokoa ho elelloa hore ho tlala ka Moea o Halalelang, ke ho tlala ka Molimo.

Notes

MOEA O HALALELANG

Notes

- b. Moea o Halalelang o na le libopeho tsa Bomolimo.
 - 1) O Hohle, hona ho bolela hore ha ho moo a leng sieo (bala Pes 139:7-10 le Johan 14:16,17).
 - 2) O tseba tsohle, ha ho na seo a sa se tsebeng (bala Esa 40:13; 1 Bakr 2:10; le Johan 16:13).
 - 3) O na le bokhoni bohle, hona ho supa hore o na le matla oohle (bala Job 33:4; le of 1 Bakr 12:11).
 - c. Moea o etsa mosebetsi oa Molimo.
 - 1) Re tla bua haholoanyane ka ntlha ena karolong e latelang ea boithuto.
 - 2) Haeba Moea o etsa mosebetsi oa Molimo, o lokela hore e be ke Molimo.
2. Moea o Halalelang ke motho.
- a. O hlahisoa e le motho.
 - 1) O bitsoa Paraclete, e leng Mothusi (Johan 14:16, 26; 15:26; 16:7). Lentsoe lena, puong ea segerike, le sebelisoa ho bonts'a ho supa botona. Ha se ntho e bonts'oang e le lipakeng (e se nang botona kapa bots'ehali)
 - 2) Ho Johan 16:13 lentsoe Moea le lateloa ke seemeli se bonts'ang botona.
 - 3) Lemoha liemeli tsa botho ('na)tse Sebelisoang ho supa Moea o Halalelang ho Lik 13:2.
 - b. O na le libopeho tsa botho.
 - 1) O na le kelello.
 - a) Oa bua (Lik 13:2).
 - b) O fana ka tataiso, ebile o khona ho etsa liqeto (Lik 15:28).
 - c) O na le mehopolo (Bar 8:27).

MOEA O HALALELANG

- 2) O na le thato (bala Lik 16:6, 7; 1 Bakr 12:11; le Gen6:3).
- 3) O na le maikutlo (bala Esa 63:10; Bae 4:30; le Bar 8:26).
- c. O na le likamano tsa botho.
 - 1) O na kamano le Jesu.
 - a) O tataisa le ho etellapele (Luk 4:1, 2).
 - b) O nka tse ho Jesu bakeng sa ho Motlotlisa (Johan 16:14).
 - 2) O na le kamano le Bakreste (bala Lik 20:23; le 2 Bakr 13:14).
3. Moea o Halalelang ke Molimo, empa e boetse ke Motho.
 - a. Boithutong ba Gen 1:1, 2, re lemoha hore Molimo le Moea oa Molimo ba na le maikarabello a fapaneng. E bonts'a hore hona le ho se ts'oane, e seng karohano, ba phela bongoeng leha ba fapane ka maikarabello.
 - b. Jesu ke Molimo, ebile o ne a na le Molimo (Johan 1:1). Moea o Halalelang ke Molimo, 'me o tsoa ho Molimo (bala Pes 104:30; Esa 44:3; Johan 14:26; 15:26; 16:7).
 - c. Moea o tsoa ho Ntate (Johan 15:26).
 - 1) Hona ho fapane le ho *romelloa* ke Ntate. Ntate o etsa qeto ea nako eo a tlang ho romela Moea. Leha ho le joalo, Moea o tsoa ho Ntate kamehla (hlokomela ketsahalo ea bojoale e tsoellang pele e sebelisitsoeng ho 15:26). Hona ha ho etsahale ka khetho. Hona ho etsahala mabapi le boleng ba Molimo.
 - 2) Boemong bona, re qala ho kena puisanong ea sephiri sa Boraro bo Teroneng. Boraro bo teroneng ke sephiri se tebileng haholo.

Ntlha ea Puisano

Nts'etsa-pele puisano ho bonts'a hore Moea o Halalelang ke Molimo, empa joale o fapane le Molimo ka maikarabello. Liphapano ke li fe pakeng tsa bona?

Notes

MOEA O HALALELANG

Notes

C. Moesebetsi oa Moea o Halalelang.

1. Popo.

- a. Molimo, ke karolo e kholo ea seo a se bopileng.
- b. Ka boteng ba Moea o Halalelang (Gen 1:2), Bomolimo bo tlisa popo e nang le sebopeho (Gen 1:2a).
 - 1) Ho bonahala Moea o ne o lokisetsa Popo. O ile a fana ka matla hore tlholeho e etsahale. O nkile karolo haholo popong ea lintho tsohle.
 - a) Hamorao, re bona taba ena ka ho hlaka ha Molimo a buisana (Gen 1:26).
 - b) Sheba Gen 1:1, lentsoe la Seheberu mona le bonts'a "Molimo" bongateng (bala le Pes 33:6).
 - 2) Moea o nkile karolo popong ea bophelo. O bile karolo tlholehong ea tsohle, ebile ke karolo bakeng sa ho nts'etsa-pele ts'ebetso ea tlholeho ea tsohle (bala Pes 104:30; Gen 2:7; le Job 33:4).
 - a) Batho bohle, ho tloha popehong ba its'etlehile ka Moea oa bophelo (Bar 8:2; 2 Bakr 3:6).
 - (1) Sheba moelelo oa Liketso 17:28.
 - (2) Sheba le Jobo 34:14, 15. Taba ke hore, ha Moea o ka tlosoa ho batho, bophelo ba batho bohle bo ka fela.
 - b) Hlokomela hore Testamenteng ea Khale, hona le pululelo ea Moea e ileng ea etsa hore batho bohle ba phele. Ho boetse hona le ho tlatsoa ka Moea bakeng sa motho ka mong (Eks 31:3). Re ntse re behile taba ena ka kelellong, re ka hlalosa joang hore Testamenteng e Ncha hona le pululelo ea Moea (Johan 20:22) le ho tlatsoa ka Moea (Liketso 2:4)?

MOEA O HALALELANG

2. Boholo ba Molimo.

- a. Molimo ha a bope feela, ebile o boloka Popo ea Hae. Ka Moea oa Hae, o lula a beha tlholeho eohle taolong.
 - 1) Boela o bale Jobo 34:14, 15 ho bona taba ena.
 - 2) Tlholeho e entsoe ebile e bolokoa ka matla a Moea o Halalelang (bala Bah 1:3; le Lik 1:8).
- b. Ho ea ka boholo ba Molimo, Molimo ha a boloke popo ea hae feela, ebile oa e laola, oa e tsamaisa. Ka Moea o Halalelang, Molimo o nkile karolo tlholehong le kamor'a hore e etsoe (bala Pes 139:7-10; Esa 63:11-14; le Hag 2:4, 5).

3. Boiponahatso.

- a. Ka Moea o Halalelang, Jesu Krete o ile a ingoa popelong ea Maria.
- b. Bala Luk 1:35 le Math 1:20.
 - 1) Bapisa litemana tsena le Gen 1:2.
 - 2) Motho e mong a ka 'na re ho thata ho etsa ntho e bonoang ka e sa bonoeng. Leha ho le joalo, re tseba hore “Ha ho letho le sitang Molimo” (Luk 1:37).

4. Tsoalo ea bobeli.

- a. Joalokaha matla a Moea a ile a sebelisoa popong ea lintho tsohle qalehong, a boetse a sebelisoa bakeng sa bophelo bo bocha ho Krete.

Notes

—

MOEA O HALALELANG

Notes

- b. Lemoha ts'ebetso ea Moea tabeng ea ho nchafatsoa (bala Esek 36:25-27).
 - 1) Etsa bonnete ba hore oa elelloa hore Mangolo ha a bonts'e e ka 'mopo o mocha o ke ke oa phetha Molao. Empa ho thoe popo e ncha e tla khona ho tsamaea ho ea ka molao.
 - 2) Moea ke mohloli. Ha se tholoana. Moea o ke ke oa iphumaneloa. Ke oona o itlisang
- c. O ntse o ipapisitse le litemana tse fetileng, bala Ese 37:9, 10, 14.
- d. Bala Jahan 3:5-8.
 - a) Mona re bona metsi, Moea, le Moea o fokang joalokaha re li bona ho Ese 36 le 37. Hape taba e ntse e le e amanang le bophelo bo bocha.
 - b) Ho tsoaloe la bobeli, ke ho tsoaloe ke Molimo kapa ho tsoaloe ke Moea.
 - c) tlhokomeliso: Jesu o tsoetsoe ke Moea nameng.
- e. Ho Johan 20:22, re bona lentsoe le ts'oanang (**pululelo**) le le sebelisitsoeng ho Gen 2:7 le Ez 37:9. Taba ke hore, ho Gen 2:7, ho bile le tlholeho kapa popo. Le hajoale hona le tlholeho le popo.
 - 1) Ho tsoaloe la bobeli ho kenyeletsa taba ea hore, Moea o Halalelang o lula ka ho Molumeli (Johan 14:17).
 - 2) Kajeno molumeli ke **Tempele ea Moea o Halalelang** (1 Bakr 6:19).
 - 3) Kahoo, Krete o phela ka ho rona (Bak 1:27; Bag 2:20).
 - 4) Ntho ena e fana ka tlhahlobo, teko kapa bopaki ba Bokreste (Bar 8:9; 2 Bakr 13:5).

MOEA O HALALELANG

5. Khalaletso.

- a. O mong oa mesebetsi e meholo oa Moea o Halalelang, ke ho halaletsa balumeli, tje kaha e le Moea oa Khalalelo.
- b. Khalaletso ke ketshalo e tsoellang-pele, ha se ntho e etsahalang hang (bala 2 Bakr 7:1; 1 Bathes 5:23; Baf 2:12, 13).
- c. Tlholo khahlanong le nama, e nka likhato tse ngata. Ketshalo ena e kenyeletsa ho lula o bolaea liketso tsa nama joalo-joalo (Bar 8:13).
 - 1) Hona ho fihleloa ka matla a Moea (Bag 5:16).
 - 2) Litholoana tsa tlholo ea motho ka mong e tla e le tholoana ea Moea (Bag 5:22).

6. Tsoho.

- a. Sehlohlolo sa mosebetsi oa Moea o Halalelang, o tla tla ka botlalo tsohong ea qetelo.
- b. Tsohong, re tla tsosoa **ka ‘Mele ea semoea** (1 Bakr 15:44), ‘me re tla tsosoa ke Moea (Bar 8:11).
 - 1) Moea oa bopa.
 - 2) O tsoala la bobeli.
 - 3) O tsosa bafu (“oa tsoseletsa, ebile o bopa bocha”).

Notes —

MOEA O HALALELANG

Notes

D. Mosebetsi oa Moea o Halalelang tikolohong ea Tumelo.

Maikutlo a Sengoli:

Ts'ebetso e kholo ea Moea o Halalelang e etsoa kahar'a kereke. Mohlomong tsena ke liketso tse bonahalang tsa Moea. Moea o Halalelang o fa sechaba sa Molimo bokhoni ba ho etsa lintho le mosebetsi e itseng.

Lehlakore lena la ts'ebetso ea Moea o halalelang e arotsoe likoto tse tharo:

1. Mosebetsi le liketso tse khethihileng tsa Moea Testamenteng ea Khale.
2. Mosebetsi ea Mesia (hona ho kenyeletsa le mosebetsi oa Jesu).
3. Mosebetsi kahar'a kereke.

1. Mosebetsi le liketso tse khethihileng tsa Moea Testamenteng ea Khale.

a. Ho etsoa ha Tabanakele le tempele.

- 1) Tabanakele (bala Eks 31:3-5). Mona re bona ts'usumetso ea Moea o Halalelang bakeng sa hore ho fihleloe ts'ebetso e khethihileng.
- 2) Tempele (bala 1 Bakr 28:12; Eks 40:34; le 2 Likr 5:13, 14). Bapisa tholoana ea ts'usumetso ea Moea maamong ana.

b. Ho etella batho pele.

- 1) Bala Num 11:17.
 - a) Moshe o ile a etella batho pele ka thuso ea Moea.
 - b) Kahoo, Israele e ile ea etelloapele ke lekhotla la baetapele ha Moea o ne o fua batho ba bang ba 70.

MOEA O HALALELANG

- 2) Bala Num 27:16-19 le Duotr 34:9. Le mona re bona boetapele bo hokahanyoa le Moea o Halalelang.

Notes —

c. Ho ahlola.

- 1) Kamor'a boetapele ba Moshe le Joshua, Baisraele ba ile ba etelloapele ke "Baahloli". Baahloli ba ne ba thusoa ke Moea o Halalelang ho loana le lira tsa bona le ho ahlolela le ho busa Israele.
- 2) Sheba mehlala e latelang:
 - a) Othniele (Baahl 3:10).
 - b) Gideone (Baahl 6:34).
 - c) Jefeta (Baahl 11:29).
 - d) Samosone (Baahl 13:25; 14:6; 14:19; 15:14).

d. Ho busa.

- 1) Ha re ntse re latella histori ea Israele, re tla nakong ea Likhosi. Re bona Moea o Halalelang ho buseng ha Likhosi.
 - a) Saule (1 Sam 11:6 le 1 Sam 16:14).
 - b) Davida (1 Sam 16:13).
 - (1) Phapang pakeng tsa Davida le Saule ke hore, Moea oa Molimo hao oa ka oa tloha ho Davida.
 - (2) Leha ho joalo, ho Pes 51:11 re utloa thapelong e boima ea Davida hore Moea o ne o ka 'na mosia.
- 2) Kamor'a Davida, ha ho boleloe letho ka ho thusana ha Moea ho Marena ao.

MOEA O HALALELANG

Notes

e. Ho profeta.

1) Taba ea baholo ba 70 (bala Num 11:25).

2) Taba ea Eldade le Medade.

a) Moea o hokahanyoa le boprofeta bo ho Num 11:26-29.

b) Hlokomela, Moea o ke ke oa thijoa ke sehlopha se itseng sa batho kapa sebaka se itseng.

(1) Eldade le Medade e ne e le karolo ea sehlopha sa batho ba 70.

(2) Ha ba ka ba profeta tabanakeleng.

3) Taba ea Balaame (bala Num 24:2, 3, 9).

4) Taba ea Saule (bala I Sam 10:5, 6, 12; le 1 Sam 19:21-24).

5) Tabeng ea Davida (bala 2 Sam 23:1, 2). Hlokomela boteng ba Moea bophelong ba Davida le nakong ea ho profeta ha hae.

6) Maemo a mang.

a) Amasai (1 Likr 12:18).

b) Mikia (1 Mar 22:24; 2 Likr 18:23).

c) Jahaziele (2 Likr 20:14, 15).

d) Sakaria (2 Likr 24:20).

e) Mikia (Mik 3:8).

f) Baprofeta ka kakaretso (Sakr 7:12).

MOEA O HALALELANG

f. Ho matlafatsa.

- 1) Bokhoni ba Serubabele ba ho haha tempele, bo tlike ka ho matlafatsoa ke Moea o Halalelang (bala Sakar 4:6, 7; le Sakar 2:4-7).
- 2) Elia o ile a nkeloa leholimong ka matla a Moea o Halalelang (bala 1 Marena 18:12 le 2 Marena 2:16).
 - a) Ka nako e ngoe, ho bonahala Esekiele a ne a “nkuoa” ke matla a Moea (Bala Ese 3:14; 8:3; 11:1, 24; 43:5).
 - b) Bapisa taba ena le ketsahalo ea Testamente e Ncha e ho Liketso 8:39, 40.

g. Kakaretso.

- 1) Hangata Testamenteng ea Khale, Moea o bonoa e le Moea o fanang ka bokhoni.
 - a) O ne a fana ka bokhoni ho motho ho etsa ts’ebetso e khethihileng eo a neng a ke ke a khona ho iketsetsa ka bo-Eena.
 - b) O ne a eketsa matla ho motho feela. o ne a sebetsa ka matla a Hae a Semoea.
- 2) Kakaretso, mosebetsi oa Moea o Halalelang, Testamente ea Khale, e ne e le oa nako e itseng kapa bakeng sa ho phethoa ha morero o itseng.
 - a) Moea o ne o tla holima Samosone nako le nako.
 - b) Moea o ile oa tla ho Saule, empa o ile oa tloha ho eena hamorao.
 - c) Moea o ba holim’a moprofeta nakong eo a profetang.
- 3) Kamehla Moea o ne o tla holim’a batho ba Molimo feela (tikoloho ea tumelo). Le ha Balame, e neng e se Moisraele, feela Israele e ne e le eona e shebiloeng.

Notes

—

MOEA O HALALELANG

Notes

Nltha ea Puisano

Bolela kamoo Moea o Halalelang, Testamenteng ea Khale, o neng o tla feela ho sechaba sa Molimo ho ba matlafatsa ha nakoana bakeng sa ho fihlella ts'ebetso e itseng feela. u nahana ke hobaneng ha Moea o neng o matlafatsa batho ba Molimo ha nakoana? Ketso ee e fapana joang le ketso ea Moea ea ho matlafatsa balumeli Testamenteng e Ncha?

2. Mesebetsi ea Mesia.

a. Eena ea tlang.

1) Bala Esa 11:1, 2.

a) Mesia o tla hlaha lelokong la Davida.

(1) Davida o ne a tlotsitsoe ka ho sa feleng ke Moea.

(2) Kahoo, Moea o ne o tla lula ho ea tlang.

b) Mesia o ne a tla amohela Moea oa Morena, ka mokhoa o matla ho feta mang kapa mang a kileng a phela. E ne tla ba tlolo e kholo hoo e tla kenyeletsa likarolo tse ts'eletseng tse fapaneng.

(1) Moea oa bohlae.

(2) Moea oa kutloisiso.

(3) Moea oa keletso.

(4) Moea oa Matla.

(5) Moea oa tsebo.

(6) Moea oa ts'abo ea Molimo.

MOEA O HALALELANG

- c) Likarolo tsena tse ts'eletseng tsa Moea, re ka re li bopa limelo tse khethehileng tse tharo tsa botho.

(1) Tsa Kelello (bohlale le kutloisiso).

(2) Tsa Nama (Keletso le matla).

(3) Tsa bolumeli/pelo (tsebo le ts'abo ea Molimo).

Ntlha ea Puisano

Na u elelloa khokahano pakeng tsa litemana tse fetileng le Esa 11:3, 5, 9?

2) Bala Esa 42:1-4.

- a) Moea o behoa holim'a Mesia.
- b) Qetello ke hore toka, boikokobetso, pelo e nolo, tiisetso, le mamello, li tla bonoa mosebetsing oa Hae.

Ntlha ea Puisano

Bua ka mofuta ona oa bosebeletsi o sebelisa Math 12:18-21.

3) Bala Esa 61:1-3.

- a) Mona, re bona taba ea tlolo/tlotso e hokahanyoa le Moea o Halalelang ka kotloloho.
- b) Mesia o na tla phetha mosebetsi oa Hae ka tlolo ea Moea.
- 4) Boleng ba Moea o neng o tla ba ho motlotsuo/mesia, o ne o tla ba matla ho feta ho mang kapa mang a kileng a tla pele ho Eena. E kenyeletsa le tlolo e neng e le ho baahloli, baprofeta, baprista, ekasitana le marena. Tlolo ena e tletse hobane le mosebetsi oa hae o tletse. Hape, le litholoana tsa mosebetsi oa Hae e ne e tla ba tse phethehileng (tse tletseng) (bala Johan 17:4; 19:30).

Notes —

MOEA O HALALELANG

Notes

b. Bahlekeli ba Mesia.

1) Johanne Mokolobetsi (bala Luk 1:15-17).

- a) Johanne Mokolobetsi e ne e le moemeli oa baprofeta ba Testamente ea Khale (bala Mal 4:5, 6; le Math 11:14).
- b) Ka tsela e ts'oanang, e ne e le moemeli ea holimo ho feta moprofeta oa Testamente ea Khale.

(1) O ile a tlala ka Moea o Halalelang a sa le popelong.

(2) E ne e le motho ea nang le tlolo e khethehileng, a reretsoe ho etsa mosebetsi o khethehileng, bakeng sa ho fihlela sepheo se khethehileng.

2) Maria 'm'a Jesu (bala Luk 1:35).

- a) Mosebetsi oa Moea o Halalelang oa ho fa batho bokhoni, o fihlella sehlohlolo ha moroetsana a fuoa monyetla le bokhoni ba ho tsoala Mor'a Molimo.
- b) Moea o ne o tla ka sepheo se khethehileng. E ne e le ho thusa Maria ho ba 'm'a Jesu. O ne o sa amane le pholoho kapa khalaletso ea Maria.

(1) Le eena o ne a ntse a hloka Mopholosi (Luk 1:47).

(2) Le eena o ne a ntse a hloka ho tlatsoa ka Moea o Halalelang (Lik 1:14).

3) Elisabeta, 'm'e oa Johanne Mokolobetsi (Bala Luk 1:41,42).

- a) Bapisa nyakallo ea Elisabeta le nyakallo ea Maria ho Luk 1:47 le nyakallo ea Jesu ho Luk 10:21.
- b) Hlokomela, o ile a tlala ka Moea ha ngoana ea tletseng ka Moea a hlasimoloha popelong ea hae, nakong eo ngoana ea tlotsitsoeng ka Moea popelong ea Maria a fihlang.

MOEA O HALALELANG

4) Sakaria, ntat'a Johanne Mokolobetsi (bala Luk 1:67, 68, 76).

- a) A ko bale litemana tse latelang ho ithuta ka Sakaria le ho tlatsoa ka Moea (bala Luk 1:5-23, 57-66. Haholo tsepamisa mahlo ho 1:7, 18 le 1:13, 60).
- b) Sakaria o ne a na le bothata ba tumelo le kutlo.
- c) O ile a tlatsoa ka Moea kamor'a hore tumelo le kutlo ea hae li nchafatsoe. Hona ho ile ha etsahala ha amohetse taelo ea ho reha ngoana Johanne, leha e ne e se lebitso la lelapa, ebile le le khahlanong le li litloaelo tsa sechaba sa habo.

5) Simeone (bala Luk 2:25-27, 30-32, 34, 35).

- a) Moea o Halalelang o ile oa lula holim'a Simeone ho hlophisetsa ho fihla ha Josefa, Maria le lesea Jesu.
- b) Simeone o ile a hlohonolofatsa le ho boka Molimo, a nto nyakalla Moreneng.
- c) O ile a sebelisoa ho profeta boleng ba pholoho, le semelo sa mosebetsi oa Jesu.

6) Kakaretso ea Bahlekeleli ba Mesia.

- a) Mosebetsi oa Moea o Halalelang liketsahalang tsena kaofela, e ne e le ho matlafatsa bakeng sa ho fihlela sepheo se khethehileng
 - (1) Bakeng sa boprofeta bo mabapi le Mesia.
 - (2) Bakeng sa ho lokisa 'mila bakeng sa Krete.
 - (3) Bakeng sa ho akofisa tsoalo ea Mor'a Molimo.
- b) Mosebetsi oa Moea o Halalelang liketsahalang tsena kaofela, o ne o tsepame ho Jesu Krete. Litemana tsohle tse qotsitsoeng ka Moea o Halalelang, kaofela li supa ho tla ha Jesu.

Notes

—

MOEA O HALALELANG

Notes

—

- c) ho ne hona le sebopeho se matla sa bolumeli bakeng sa ba ileng ba matlafatsoa ke Moea o Halalelang.
 - (1) Bohloeki, boikokobetso, le boitolobetso, ke tse ling tsa libopeho tsa ba sebelisoang ke Moea.
 - (2) bala Luka 1:6, 15, 30, 38; 2:25.
- d) Le ho batho bana, Moea o Halalelang o ne o ntse o tllile ha nakoana, bakeng sa morero o itseng o khethehileng (ntle le ho Johanne Mokolobetsi).
 - (1) Elisabeta, Sakaria, le Simeone ba ile ba buisoa ke Moea ha nakoana.
 - (2) Moea o Halalelang o ile a tla ho Maria bakeng sa ketsahalo e le ngoe e kholo-kholo.
- e) Mosebetsi oa Moea o Halalelang o ne o etsoa ho ipapisitsoe le tumelo, tebello, le kutlo.
 - (1) Boela o shebe lintlha tse fetileng tse buoang ka Maria (bala Luk 1:38 le 1:45).
 - (2) Simeone o ile a ema ka tumelo ho fihlela letsatsi leo a boneng pholoho ea Molimo.
- f) Boteng ba Moea o Halalelang le mosebetsi oa Hae, li ne li tlisa nyakallo le lehlohonolo (bala Luk 1:41-47; 1:64, 68; le Luk 2:27, 28, 34).
- (g) Mosebetsi oa Moea o Halalelang o ne o etsoa har'a sechaba sa Molimo.
 - (1) Lemoha leloko la boprsta la Sakaria, Elisabeta, Johanne Mokolobetsi (Luk 1:5).
 - (2) Bala 1:27 le 2:25.

MOEA O HALALELANG

c. Mosebetsi oa Jesu.

Notes

- 1) Li-Evangeli tse ‘ne kaofela, li na le kolobetso ea Jesu, le ho theohela ha Moea holima Hae, e le motheo oa mosebetsi oa Jesu (Bala Math 3:13-17; Mar 1:9, 10; Luk 3:21, 22; Johan 1:32, 33; haholo Luk 3:23).
 - a) Ho tla ha Moea o Halalelang holim’a Jesu, e ne e le bakeng sa mosebetsi oa hae ka kakaretso.
 - b) E ne e le tlotso ea kamehla eohle (Johan 1:32).
 - c) E ne e le tlolo e se nang moeli (Johan 3:34).
 - d) Hona e ne e le mosebetsi oa bobeli oa mantlha oa Moea o Halalelang bophelong ba Jesu.
 - (1) Oa pele, o tsoetsoe ka matla a Moea a Halalelang.
 - (2) Oa bobeli, o ile a matlafatsoa ke Moea o Halalelang bakeng sa mosebetsi oa Hae.
 - e) Tlolo ea Jesu ho tsoa ho Moea o Halalelang e ne e khethehile.
 - (1) Maholimo a ile a buleha (ka kotloloho, a ile a “paroha ha beli”).
 - (2) Moea o ile oa theoha ka sebopeho sa leeba.
 - f) Tlolo ea Jesu ile ea senola Boraro bo Teroneng.
 - (1) Ntate o ile a bua.
 - (2) Mor’a o ile a phatlalatsoa.
 - (3) Moea o ile oa theoha.
 - g) Tlolo/tlotso ea Jesu e ile ea sebelisoa e le monyetla oa ho netefatsa boleng le mosebetsi oa Jesu (bala Johan 6:27 mabapi le ntlha ena).

MOEA O HALALELANG

Notes

—

2) kolobetso ea Jesu e amana le ho tlotsoa ha Jesu joang, ke Moea?

a) Jesu o ile a kolobetsoa (leha a ne a se na sebe) e le hore a tle a **Phethe ho Loka Hohle** (Mat h3:15).

(1) O ile a etsa hoo bakeng sa ho utloisisa le ho tla boemong ba botho ba sebe. o ile a bonts'a tlhoko ea pako le ts'oarelo.

(2) Ketso ena e ne e le motheo oa ho tla ha Moea o Halalelang, le qaleho ea mosebetsi oa Jesu.

(3) Leha ho le joalo, kolobetso ha se eona e theotseng Moea. Ho theoha ha Moea, e ne e se lehlakore la Semoea la kolobetso ea metsi. Lehlakore la semoea la kolobetso ea metsi, ke ho loka hoo Jesu a ileng a ho fihlella kapa ho o phethahatsa.

(4) Kolobetso le ho theoha ha Moea ke liketsahalo tse peli tse fapananeg ruri. Hona le maikutlo a ho arola liketsahalo tsena tse peli ho Luk 3:21, 22. O ile a kolobetsoa. O ile a qala ho rapela. Eaba Moea o theohela ho Eena.

b) Kolobetso ke tlhophisetso ea bohlokoa ea ho tla ha Moea. Leha ho joalo, sepheo sa ho kolobetsoa ha Jesu le sepheo sa tlotso ea hae, ke lintho tse peli tse fapaneng.

(1) Sepheo sa kolobetso ea Jesu, e ne e le ho phethahatsa bohloeki/ho loka hohle.

(2) Sepheo sa ho tlotsoa ha Jesu, e ne e le hore a tle a tsebe ho ba le matla bakeng sa mosebetsi oa Hae (bala Liketso 10:38).

MOEA O HALALELANG

3) ho tlotsoa ha Jesu ke Moea, ho amana joang le ha Jesu e se e le Eena ea kolobetsang ba bang ka Moea (bala Johan 1:33)?

Notes —

- a) Maikutlo e ka ba hore, kaha Moea o ile oa theohela ho Jesu, oa ba oa lula ho Eena, le Eena o ne a tla tlotsa ba bang bakeng sa mosebetsi ka Moea o ts'oanang.
- b) O ile a tlotsoa ke Moea o Halalelang ka ho feletseng (Johan 3:34). Lentsoe kolobetso le bolela “ho qoelisa, kapa ho koahela ka botlalo”. Le Eena o ne a tla tlotsa ba bang ho se tekanyetso.
- c) Hape, re lokela ho etsa tlhalohanyo pakeng tsa kolobetso ea metsi le kolobetso ea Moea.
 - (1) Kolobetso ea Metsi e ne e amana le pako le ho loka.
 - (2) E ne e bonts'a boikarabello ba mantlha ba Jesu. Ke Mopholosi (Johan 1:29)
 - (3) Kolobetso ea Moea, e ne e amana le matla bosebeletsing.
 - (4) E ne e bonts'a boikarabello ba Jesu e le Eena ea kolobetsang ba bang ka Moea o Halalelang (Johan 1:32, 33).

4) Qaleho ea Mosebetsi oa Jesu.

- a) Bala Luk 4:1.
 - (1) Jesu o ile a qala mosebetsi oa Hae **e le Eena eo** Moea o tlileng ho Eena ka botlalo(ka ho feletseng).
 - (2) Jesu o ile a qala mosebetsi oa Hae **e le Eena eo** Moea o leng ts'ebetsong ka botlalo.

MOEA O HALALELANG

Notes

b) A ko shebe Luk 4:1 ‘moho le Luk 4:2.

(1) Ke Moea o ileng oa isa Jesu lefeelleng ho ea lekoa ke Diabolosi. Qalong ea mosebetsi oa Hae, o ile a lokela ho lekoa ke Satane.

(2) O ile a lokela ho hlola maqiti oohle a diabolosi. Moea e ne e le oona o akofisitseng ketsahalo ena.

Ntlha ea Puisano

Haeba Jesu a ile a nkeloa ke Moea ho ea lefeelleng ho lekoa ke diabolosi, na re lokela ho bona liketsahalo tsee li ka etsahala bophelong ba rona? Na e be lefella le teko ha se mokhoa oa Molimo oa hore lokisetsa bosebeletsi bo hloahloa, ba nako eohle?

c) Bala Luk 4:14, 15.

(1) Ho hlola teko, ho ile ha akofisa boiponahatso ba Moea bophelong ba Jesu. “o ile a khutla a tletse Moea o Halalelang.”

(2) Lemoha tatellano ea liketsahalo litemaneng tsena tse peli. Batho **ba ile ba utloa** ka Jesu le pele a qala ho ruta. Matla a Moea o holim’a hae a ne a sa ipate.

d) Bala Luk 4:18, 19.

(1) Re ka khona ho bona khokahano pakeng tsa mosebetsi oa Moea le li-pheo tsa mosebetsi oa Jesu.

(2) Mosebetsi oona o tletse. O ne o kenyeletsa ho ruta, ho shomaela, ho folisa, le ho lokolla ba litlamong.

(3) Le mosebetsi oa Moea o ne o tletse. Joalokaha re ile ra bona Mangolong a mang, Jesu o ne a **tletse** ka Moea, o ne a **tsamaisoa** ke Moea, o ne a **matlafalitsoe** ke Moea, a bile a **tlotsitsoe** ke Moea.

MOEA O HALALELANG

5) Tsoelopele ea Mosebetsi.

Notes

- a) Lemoha meelelo ea Litemana tse latelang, mabapi le mosebetsi oa Moea, mosebetsing oa Jesu oa ho bua: Mar 1:21; Math 7:28; Luk 4:32; Johan 6:63.
- b) Lemoha meelelo ea Litemana tse latelang, mabapi le mosebetsi oa Moea, mosebetsing oa Jesu oa ho folisa le ho lokolla ba litlamong: Luk 5:17; Math 12:28; Lik 10:38.
- c) Mosebetsi oa Jesu oa matla, e bile tlhaselo e sa emiseng khahlanong le meea e lits'ila. Ho Math 12:29, Jesu o bolela hore monna ea matla (diabolosi) o lokela a tlangoe pele ho nkoa thepa ea hae (tokollo ea batho ba tlasa taolo ea hae).
 - (1) Monna ea matla o tlangoa ka matla a Moea. Hopola ketsahalo ea lefeelleng. Tlholo ea Jesu ho diabolosi, e ile ea etsa hore diabolosi a tlangoe. O ile a lokela ho tloha ho Jesu (Luk 4:13). Jesu o ile a khutla a tletse Moea o Halalelang.
 - (2) Mona maikutlo ke hore Jesu o ile a lokela ho hlola litlhaselo tsa diabolosi pele khahlanong le Eena. Ha ho le joalo, o ne a ka khona ho thusa ba bang.
- d) Karolo e ngoe ea mosebetsi oa Jesu ke katiso ea oona mosebetsi oo (bala Luk 10: 17-19).
 - (1) Moea o neng o lutse ho Jesu, o ile oa mofa bokhoni ba ho abela batho ba bang matla le taolo ea semoea. Le bona ba ile ba khona ho sebeletsa ka matla a Moea. Moea o lula o le ts'ebetsong.
 - (2) Ho hlile ho joalo, “ka eona nako eo Jesu a nyakalla” (Luk 10:21). Mantsoe “a nyakalla” ke tlhaloso ea lentsoe le khethehileng la Segerike, le bonts'a maikutlo a fetang a thabonyana e tloaelehileng feela, le bonts'a ho ithabela ho Moea.

MOEA O HALALELANG

Ntlha ea Puisano

Notes

Ho hlakile hore Jesu o ne a hloka tlotso ea Moea holim'a hae (e leng se ileng sa etsahala ha Moea o theohela ho eena joaloka leeba), bakeng sa ho sebeletsa ka matla botlalong ba Molimo. Na le rona re lokela ho fumana tlolo ea mofuta oo? Nka nako ea ho rapela hore Moea o tlotse sehlopha sa bosebetsi, le ho amohela matla a macha ho tsoa ho Moea.

3. Mesebetsi kahar'a Kereke (Ho tla ha Moea).

a. Paraclete kapa Mothusi (bala Johan 14:16, 17; Johan 14:26; Johan 15:26; Johan 16:7).

- 1) Jesu o ne a tla romela Moea ho barutuo ba Hae.
- 2) Moea o ne o tla nts'etsa-pele mosebetsi oa Jesu (Johan 16:8).
- 3) Barutuo ba ne ba tla nts'etsa-pele mosebetsi oa Jesu ka thuso ea Moea o Halalelang.
- 4) Joalokaha re ile ra bona pele, Moea o ne o se o tlele ho barutuo bakeng sa tsoalo ea bobeli (Johan 14:17; 20:22). Leha ho le joalo, ba ne ba lokela ho emela Moea hore o thehele holim'a bona bakeng sa ho anetsa evangeli (Johan 16:7).
- 5) Jesu o ile a tlotsoa ke Moea ha maholimo a buloa, eba Moea oa theoha. Hajoale Moea o se o rometsoe ho tsoa leholimong (1 Petr 1:12).
- 6) Maamong ana ka bobeli, baamoheli ba matla a Moea o halalelang, ba ne ba se ba tsoetsoe ka Moea. Jesu o ile a tsoaloa ka Moea popelong ea Maria. Barutuo ba ile ba tsoaloa ka Moea ha Jesu a ne a bululela ho bona ho Johan 20:22.

MOEA O HALALELANG

- 7) Baamoheli ba matla a Moea o Halalelang, nakong ea Pentekonta, e ne e le batho ba tumelo.
- a) Pele ho tsoho (pele ho Johan 20:22 le tsoalo ea bona ea bobeli), tumelo e ne e fokola (bala Math 6:30; 8:26; 14:31; 16:18; 17:20; Mar 14:50; Luk 24:12).
 - b) Kamor'a ketsahalo ea Johan 20:22 (e bonts'oang ke taba ea ho "fetoha hape" joalokaha Petrose a ile a etsa pejana tsatsing leo) tumelo e ile ea tsoaloa. Balumeli ba ne ba tla ema ho fihlela ba amohela matla bakeng sa bosebeletsi. Matla a na ke neo.
 - c) Taba ea ho tla ha Moea o Halalelang ka letsatsi la Pentekonta e le neo, ho ba seng ba sokolohile, e bonoa lipolelong tsa Petrose ho Liketso 11:17 (hape sheba Liketso 2:38, 39).
 - d) Re lokela ho elelloa hore ho bululeloa ha Moea ho Johan 20:22, ha se ho tla ha Moea joalokaha o ts'episitsoe ho Johan 16:7, hobane nakong ena eo a ba bululelang, o ne a so ee leholimong ho tlotlisoa (bala Johan 16:7 le Johan 20:17; Johan 7:39; Baf 2:9-11; Bae 1:20, 21).
- 8) Barutuo a ba ile ba itsebela liketsahalo tse peli tse fapaneng ka Moea o Halalelang. Liketsahalo tsena li etsahetse bakeng sa li-pheo tse peli.
- a) Ketsahalo ea pele ho Johan 20:22 e ne e le bakeng sa tsoalo-bocha.
 - b) Ketsahalo ea bobeli e ne e le bakeng sa bosebeletsi ho ba bang.

Notes

—

MOEA O HALALELANG

Notes

c) tsela e ngoe ea ho bona hona, ke ho bala Johan 4:10-14 o e bale 'moho le Johan 7:37-39.

(1) Ho ne hona le ho nooa ha Moea. Ntho ena e amana le pholoho ka kotloloho (**seliba sa metsi, se phallang ho ea bophelong bo sa feleng**).

(2) Ho ne ho boetse hona le phallo e ts'olohang. Hona ho tsoa ho balumelang, 'me ho ne ho tla bonahatsoa ha Jesu a se a tlotlisitsoe. Litlhohonolofatso tsa balumeli, li ne li tla phalla hoo li ts'olohelang ho ba bang ka mosebetsi o matlafalitsoeng oa balumeli (lemoha khokahano e teng pakeng tsa ho matlafatsoa ke Moea le mosebetsi oa balumeli ho Liketso 1:8).

(3) Moea o tlileng ka Pentekonta, o ne o tla bakeng sa batho bao e neng e se e le balumeli, kaha sepheo sa ho tla ha Oona, e ne e se bakeng sa tsoalo-bocha, empa e ne e le ho matlafatsa balumeli bakeng sa mosebetsi oa Molimo (sheba meelelo ea litemana tse kang Johan 14:17, Lik 2:38, Lik 5:32, Lik 8:12-16).

Ntlha ea Puisano

Tsoelapele ho bua ka phapano ea ho amohela Moea bakeng sa pholoho, le ho matlafatsoa ke Moea bakeng sa mosebetsi le bosebeletsi. Na u lemoha tlhoko ea rona bakeng sa liketsahalo tsee ka bobeli? Na u na le boitsebelo ba liketsahalo tsee li le peli? Haeba ho se joalo, nka nako ea ho rapela bakeng sa hore Molimo a u tlatse ka Matla a Moea.

b. Neo ea Moea o Halalelang (bala Luk 11:5-13).

1) Moelelo oa temana ena, ke ho fanoa ha mpho (tem. 13) Moea o halalelang o hlaloso e le Neo.

2) Neo ena ea Moea o Halalelang, e fuoa batho bao e seng e ntse e le bana ba Molimo (tem. 11-13).

MOEA O HALALELANG

- 3) Neo e fanoa bakeng sa bosebeletsi. Sheba moelelo oa pale ena.
 - a) Motho o batla ho “sebeletsa” motsoalle ea tlang ho eena bosiu.
 - b) Leha ho le joalo, ha a na letho leo a ka mosebeletsang ka lona (Bala Liketso 3:6).
 - c) Joale o ea ho motsoalle e mong oa hae, a kope hore a mofe mpho eo a ka “sebeletsang” ka eona. Mpho e fanoang ke ea bosebeletsi.
- 4) Ho fanoa ha Moea o Halalelang, ho amana le boits’etleho le takatso.
 - a) Moelelo o mong, ke oa thapelo e sa khaotseng (tem. 8-10).
 - b) Empa moelelo o moholo ke oa thapelo le kamano le Jesu.
 - (1) Thuto ea Luk 10:38-42, ke hore, kamano le Jesu e bohlokoa haholo.
 - (2) Ho Luk 11:1 re bona Jesu a rapela. Re boetse re hopotsoa khokahano e pakeng tsa ho tla ha Moea o Halalelang, le ho rapela ha Jesu (boela o bale Luk 3:21). Ha re boetse re shebela pele, re tla elelloa hore barutuo ba ne ba eme ba bile ba rapela ka tiisetso (Lik 1:4, 14) ha Moea o Halalelang o tla lula holim’a bona ka Pentekonta.

Notes —

MOEA O HALALELANG

Notes

—

(3) Barutua ba kopa ho rutoa ho rapela (Luk 11:1). Jesu o fana ka tsela (tem. 2,3).

(a) Taelo ea ho rapela e kenyeletsa le kopo ea hore 'Muso o tle. Mona re hopotsoa taba ea ho tla ha Moea o Halalelang.

(b) Taelo ea ho rapela, e kenyeletsa le ho kopa bohobe ba letsatsi ka leng. Mona re hopotsoa ka bohobe, paleng e latelang, e leng ponts'o ea ho sebeletsa ba bang.

5) Qetellong, re lokela ho hlakisa hore neo ke Moea o Halalelang ka bo-Eena. Ha se ntho e Moea o e tlisang kapa o e etsang (joaloka ho bua ka maleme a sele). Ke Moea ka bo-Eena ea tlang e le neo. Hape, re lokela ho hopola hore Moea o Halalelang ha se maleme (leha ha a fana ka neo ea maleme). Moea o Halalelang ke Molimo. Kahoo, neo ea Moea o Halalelang, ke neo ea Molimo ka sebele sa Hae.

c. Mantsoe a qetellang a Jesu (bala Liketso 1:4,5).

1) Ho tla ha Moea ke ts'episo ea Ntate (Bala Lik 2:33; Luk 24:47-49). Hore hona e be ts'episo e tsoang ho Ntate, ba ts'episoang ba lokela hore e be e se e ntse e le bana ba Molimo.

2) Joalokaha re ile ra bolela, taba ea kolobetso ea Moea o Halalelang, e fapane le taba ea pholoho. Hona le tatellano e lokelang ho eloa-hloko. Pholoho e tla pele ho kolobetso ea Moea.

MOEA O HALALELANG

- 3) boela o shebe Mar 1:8; Luk 3:16; Math 3:11.
- a) Kolobetso ea Johanne ea metsi e ne e le ea pako le ts'oarelo ea libe (Mar 1:4; Lk 3:3).
 - b) E ne e etsoa e le tlhophisetso ea mosebetsi oa eo a ka khonang ho tlosa libe (Johan 1:29).
 - c) Hamorao, molaetsa o ts'oanang oa pako o ile oa phatlalatsoa. Mokhoa o ts'oanang oa kolobetso ea metsi. Leha ho joalo, **phetoho** ke hore, kolobetso e se e etsoa **ka lebitso la Jesu Krete** (Lik 2:38). Pholoho e ile ea ba teng bakeng sa bohle. Tlhophiso ea kolobetso ea Johanne, e ile ea ba temoso ea pholoho ka mosebetsi oa Jesu sefapanong.
 - d) Taba ea hore Jesu o kolobetsa ka Moea o Halalelang, ke ntlha e ikemetseng ka bo-eona. Ha ho buoe ka eona hape (kamor'a Luka 3:16) ho fihlela ho Liketso 1:5. Kahoo, e amana ka kotloloho le sepheo sa ho ba le matla bakeng sa ho paka (Lik 1:8), 'me e etsahala kamor'a hore Moea a etse tsoalo-bocha ho Johan 20:22.
 - (1) Pholoho e lokela ho tla pele ho kolobetso ea Moea.
 - (2) Pholoho e se nang kolobetso ea Moea, ke pholoho e sa fellang ka hore, e ntse e emetse ho matlafatsoa bakeng sa basebeletsi.

Notes

Maikutlo a Sengoli:

Taba ena ea hore na motho o matlafatsoa ke Moea o Halalelang neng, hona joang, e etselitsoe likhang nako e telele, meloko-lokong. Se ke be oa lumella phapang ea lithuto tsa makhotla a likereke kapa lithuto tsa batho ho ba lejoe la khopiso tabeng e bohlokoa hakana-kana. Re hloka tlolo/tlotso ea Moea o Halalelang bakeng sa mesebetsi oa rona. Ho sa tsotellehe phapano ea mantsoe a sebelisoang le mekhoha e sebelisoang ho hlalosa ho amoheloa ha Moea o Halalelang, batla tlolo ea Moea o Halalelang e re thusang ho ba basebeletsi ba matla ba Evangeli!

MOEA O HALALELANG

Notes —

III. Matla a Moea o Halalelang.

A. Selelekela.

Mohlala oa Sengoli:

Banna ba babeli ba kile ba etela Liphororo Niagara (e ngoe ea liphororo tse kholohali kahar'e ho lefats'e). Tseleng ba ile a ba elelloa le ho makalla noka ea Niagara. Ntho e neng e hlolla, ke maqhubu a potlakang a neng a bonahala pele ho liphororo.

Monna e mong o ile a re ho e mong, "Tloho ke u bonts'e matla a sa sebelisoeng ka ho fetisisa lefats'eng." O ile a moisa qetello ea phororo, moo metsi a neng a otlala teng, ho tloha boleleng ba maoto a makholo-kholo ho tsoa holimo. A re, "Hona le matla a maholo a sa sebelisoeng lefats'eng."

Monna e mong a hana. O ile a re, "Ntho ena ha se 'nete. Matla a sa sebelisoeng ka ho fetisisa lefats'eng, ke matla a Moea o Halalelang oa Molimo."

Ka bomalimabe, taba ena ke 'nete. Leha ho le joalo, ha a sebelisoa ka tsela eo a lokelang ho sebelisoa ka oona.

Beha mohlala oa hau

MOEA O HALALELANG

1. Ho tsoa bukeng ea Liketso 1:8, lentsoe **Matla** le tsoa lentsoeng la Segerike “**Dunamis**”. Ke lentsoe le bolelang “matla a qhomisang”. Ho tloha lentsoeng lena la Segerike, re fumana lentsoe “seqhomisa”.
2. Matla aa a qhomisang a ho kae? Ke a fumana joang? Matla aa a qhomisang a sebelisoa bakeng sa eng?
3. Ka boithuto bo tebileng ba lentsoe “**Dunamis**” (leo hangata le tolokoang e le “matla”) re batla ho araba lipotso tsena ka tsela e latellanang hantle.

Notes —

B. Matla aa a qhomisang a kae? Ke a fumana joang?

1. Libaka tseo matla ana a qhomisang a ke keng a fumanoa ho tsona.
 - a. Ha a fumanoe ho Satane.
 - 1) Lentsoe **Dunamis** lea hlaha ha ho bua ka mor’a tahleho (2 Bathes 2:9).
 - 2) Leha ho le joalo, ke **Dunamis** ea bohata, ka hore, e bonts’oa ho thetsa (hlokomela mantsoe ana “mehlolo e thetsang”). Ke **Dunamis** e tla leka ho tlosa le ho fetola **Dunamis** ea ‘nete.
 - 3) **Dunamis** ea Satane e ea fokola.
 - a) E fokolla **Dunamis** ea Jesu (Bae 1:21).
 - b) E fokolla **Dunamis** ea ba rongoeng ke Jesu (Luk 10:19).
 - b. Ha e bolumeling bo se nang metso, bolumeli ba kantle. Batho ba ts’oarellang liketsong tse kantle feela tsa bolumeli feela ba sa teba kamanong ea bona le Molimo, ba hana **Dunamis** ea Molimo (2 Tim 3:5).

MOEA O HALALELANG

Notes

2. Sebaka seo matla ana a fumanoang ho sona.
 - a. A teng kahar'a Kereke: Hlooho.
 - 1) Taba ea pele ke hore, matla a fumanoa ho Molimo.
 - a) Ha a lule ho rona hore rea sebelise feela kamoo re batlang. Kamor'a ponahatso ea matla a Molimo, a ileng a etsa hore seritsa se tsamaee, Petrose o ile a hlalosa hore **Dunamis** ha se ea rona (Lik 3:12).
 - b) E fumanoa ho Molimo.
 - (1) Petrose o tsoelapele ho hlalosa hore matla a tsoa ho **Molimo oa Abrahama, Isaka, le Jakobo** (Liketso 3:13).
 - (2) Petrose o ne a sebelisoa e le lefiso leo matla a phallang ka lona. Kahoo, Paulosi ho 2 Bakr 4:7 o bua tjena mabapi le **Dunamis**, "**empa letlotlo leo re na le lona lipitseng tsa letsopa.**"

Mohlala oa Sengoli:

Ho thoe monna e mong o ne a theosa seterata ha a bona ntho e makatsang. Ho ne hona le monna e mong a pompang ka pompo ea letsoho ka potlako e makatsang. O ile a etsa hoo nako e telele e ka ha a khathale. Motho ea shebileng sena, o ile a etsa qeto ea ho atamela a shebisise. Ha atamela, o ile a elelloa hore, ntho e pompang ha se motho, ke sets'oants'o sa sefate se betliloeng, sa ba sa pentoa joaloka motho. Sets'oants'o sena se ne se hokeletsoe pompong joalokaha e ka ke motho ea pompang. Metsi a ne a tsoa haholo, empa e ne e se hobane sets'oants'o seo se pompa. Hantle-ntle, metsi a ne a tsoa selibeng seo sets'oants'o seo se neng se behiloe, 'me metsi e ne e le oona a pompang sets'oants'o seo sa motho.

Hona ho ts'oana le matla a Molimo. Motho a sebeletsang Molimo e ba o fumana litholoana, ke motho eo Moea o Halalelang o sebetsang ka eena. Ntho e ngoe eo motho a lokelang ho e etsa ke ho lula a behile letsoho sets'oarong.

MOEA O HALALELANG

Beha Mohlala oa hau

Notes —

- 2) Ka ho otloloha, matla ana a qhomisang a fumanoa ho Moea o Halalelang (Liketso 1:8) ka lebitso la Jesu (bala Liketso 4:7-10 le 1 Bakr 1:24).

Maikutlo a Sengoli:

Ke hopola ke rapella mohlankana oa seritsa, eo 'mele oa hae o neng o sothehile. Motho e mong o ne a tsamaisa thapelo. O ile a rapella pholiso. Nakong eo a reng 'ka lebitso la Jesu', moshanyana o ile a fola hang. Linoko tsa hae tse neng li kobehele tsa koboloha, a qala ho tants'a. E, hona le matla lebitsong la Jesu.

- 3) Qetellong, re lokela ho hopola hore matla a tsamaisoa ke boholo ba Molimo. **Dunamis** e fumanoa boholong ba Molimo.
- a) Molimo o khetha ea mofang **Dunamis** le hore na hobaneng a mofa (Bar 9:17).
 - b) Molimo ke Eena ea etsang khetho eo boleng ba **Dunamis** e lokela ho fanoa (bala Math 25:15). Elelloa hore phapano ea kabo e mabapi le **Dunamis** ea hae(bokhoni).
 - c) Molimo ke Eena ea etsang khetho ea hore na o bonahatsa **Dunamis** neng (sheba moelelo oa Luk 5:17).

MOEA O HALALELANG

Notes

—

- b. Matla ana a qhomisang a kahar'a kereke: 'Mele (Moesbetsi oa Kereke).
 - 1) **Dunamis** e fumanoa bongoeng, kopanong, le karolelanong e kahar'a kereke (bala Liketso 4:33).
 - a) **Dunamis** e hlahisoa ho ipapisitsoe le temana ea 32.
 - b) Maemo a likereke tsa rona a joang kajeno?
 - 2) **Dunamis** e fumanoa thutong ea Lentsoe.
 - a) Ho ruta sefapano (1 Cor 1:18).
 - b) Ho ruta Evangeli (bala Bar 1:16; Liketso 8:13; Bar 15:19; Mar 16:20).
 - 3) **Dunamis** e fumanoa ntoeng e matla ea semoea.
 - a) Sheba moelelo oa Ts'en 12:10.
 - b) Carlos Annacondia, Moevangeli oa Argentina, o bolela hore katleho ea hae ea mosebetsi o matla, e ipapisa le katleho ea hae ntoeng ea semoea. O choatla liqhobosheane tse matla tsa mademona pele a qala lits'ebeletso le liboka tsa hae. Kamor'a moo, seqhomisa sea qhoma sea choatla.
 - 4) **Dunamis** e fumanoa ho ikatiseng ha mosebetsi.
 - a) **Dunamis** e bonahatsoa ha Jesu a atisa mosebetsi oa hae.
 - b) Sheba neheletsano ho tloha ho Luk 6:12,13 ho ea ho 6:19 le ho 9:1.

MOEA O HALALELANG

c. Matla a qhomisang a fumanoa kerekeng: motho ka mong.

- 1) **Dunamis** e fumanoa boikokobetso le bofokoling (bala 1 Bakr 2:3-5 le 2 Bakr 12:9).
- 2) **Dunamisa** fumanoa lipolelong.
 - a) Bala 1 Bakr 14:11. Lemoha hore **moelelo oa puo, ke puo ea Dunamis**.
 - b) Mantsoe a na le matla (1 Bakr 2:4; Liprov 15:1; Liprov 26:22; Esa 50:4; Math 12:36, 37; Jak 3:1-12).

Maikutlo a Sengoli:

Mopolotiki ea tsebahalang haholo o kile a re, “Mphe baetapele ba sesole ba 26, ke hlole lefats’e.” Sesole seo a neng a bua ka sona, ke lithaku tse 26 tse hahang puo ea Senyesemane, tse sebelisoang lipampiring ho haha mantsoe a Senyesemane.

- 3) **Dunamis** e fumanoa mats’oenyehong. Hlokomela khokahano ho 2 Tim 1:8.
- 4) **Dunamis** e fumanoa kamanong le Jesu (bala Luk 8:46 le Luk 6:19).
 - a) **Dunamis** e ile ea bonts’oa nakong eo mosali a neng a **ama** Jesu.
 - b) Re ntse re ka ama Jesu le kajeno ka ho ba le kamano e tebileng ea botho le Eena.

Notes

—

MOEA O HALALELANG

Notes

5) **Dunamis** e fumanoa tumelong.

a) Bala Bag 3:5 (**Dunamis** e tolokoa mona e le **mehlolo**).

b) Bala Bah 11:11 (**Dunamis** e tolokoa e le **bokhoni**).

c) Bala Mar 5:30, 34.

d) Bala Math 13:54-58 (**Dunamis** e tolokoa e le **mehlolo** temaneng ea 58).

6) **Dunamis** e fumanoa ka kutlo.

a) Lemoha kamano pakeng tsa **Dunamis** le kutlo ho Ts'en 3.8.

b) Bona kamoo kutlo ea Jesu lefeelleng e amanang le **Dunamis** ka teng ho Luk 4:14 (boela o bale Liketso 5:32).

3. Hantle matla aa a ho kae? Ke a fumana joang?

a. Hona le le lentsoe le leng le akaretsang karabelo. Lentsoe leo ke **Lefu**.

1) U ka fumana matla ana ka ho shoa bo-uenana. Matla a qala ho lokolloa nakong eo le rona re lokollelang Molimo maphelo a rona.

2) Litemana tse ling kaofela tseo re li sebelisitseng, li bua ka ho shoa bo-uenana o nto jara sefapano sa hau.

a) Ho shoa maikutlong a hore matla a ho uena.

b) Ho shoa leruong le boipokellong, e le hore o khone ho arolela ba bang.

c) Ho ruta ka lefu la Jesu sefapanong.

d) Ho shoa takatsong ea hau ea ho ikhahela 'muso, ho ena le ho batla ho atisa, anetsa, le ho atolosa 'muso oa Molimo, le mosebetsi oo a u nehileng oona.

MOEA O HALALELANG

- e) Ho shoa boikhohomosong ba hau.
 - f) Ho shoa maikutlong a boiketlo, e le ho ikemisetsa ho kopana le mats'oenyeho.
 - g) Ho shoa litakatsong tsa nama, bakeng sa ho ba le kutlo ho Molimo.
- b. Hantle-ntle, potso ha ea lokela ho ba: **Matla aa a qhomisang a kae?** Potso e lokela ho ba: **Na u ikemiselitse ho shoa?**
- 1) Ho Liketso 1:8, lentsoe la Segerike **Dunamis** le hokahantsoe le **matir** (le tolokoa e le **lipaki** – ea fanang ka bopaki le netefatso ea se bonoeng kapa se tsejoang).
 - 2) Ho tsoa lentsoeng lena, re fumana lentsoe “martyr”, le bolela motho ea kholisehileng ka seo a se boneng kapa a se tsebang hoo a ka behang bophelo ba hae tsietsing ho emela bopaki boo. E, **Lefu** le **Dunamis** ha li arohane.
 - 3) Sheba mofuta oona oa khokahano ho Baf 3:10; Ts'en 5:12; Johan 12:24 (sheba le Johan 15:2).
3. Joale, matla aa a ho kae?
- a. Mohloli oa matla ana a qhomisang ke Molimo ka sebele sa Hae.
 - b. Lefiso le sebelisoang ke Kereke (Bae 1:19; 3:20).
 - 1) Lemoha kamoo **Dunamis** e re **tobileng** e bileng e **sebetsang ka ho rona** ka teng litemaneng tse peli tse fetileng.
 - 2) Ha e re e sebetsa ho baevangeli ba khethehileng feela. Kereke ke 'mele. Seqhomisa se teng bakeng sa setho se seng le se seng sa 'mele oa Krete.

Notes

—

MOEA O HALALELANG

Notes

C. Matla aa a molemong oa eng?

1. Selelekela.
 - a. Kamehla re lokela ho hopola hore **Dunamis** e fanoa bakeng sa ho tlotlisa le ho phahamisa Jesu (2 Bathes 1:11, 12).
 - b. Kahoo, boithuto bona ba qetelo ba **Dunamis**, e tla ba boithuto ba litsela tsa ho fa Jesu Khanya.
2. Ts'ebeliso ea **Dunamis**.
 - a. Matla a qhomisang bakeng sa mehla ea bofelo.
 - 1) Jesu o tla khutla ka **Dunamis** (Math 24:29, 30).
 - 2) Re tla tsosoa ka **Dunamis** (1 Bakr 6:14).
 - 3) Hona le **Dunamis** (manyeloi a matla mollong o matla) bakeng sa kahlolo (2 Bathes 1:7, 8).
 - 4) **Dunamis** e tla hokahanyoa le puso e tletseng ea Molimo (Ts'en 11:17).
 - 5) **Dunamis** e thetsang e tla sebelisoa ke sera ho leka ho thetsa balumeli (2 Bathes 2:9).
 - b. Matla bakeng sa litlhohonolofatso tsa batho ka kakaretso.
 - 1) Hona le **Dunamis** Ts'enolong e akaretsang (Bar 1:20).
 - 2) **Dunamis** e boloka, le ho ts'ehetsa, le ho tsamaisa lefats'e (Bah 1:3).
 - c. Matla bakeng sa litlhohonolofatso tsa Molumeli.
 - 1) Ho ba le **tiisetso, mamello, le thabo** (Bak 1:11).
 - 2) Ho sireletseha (1 Pt 1:5).
 - 3) Ho ba le ts'epo (Bar 15:13).

MOEA O HALALELANG

d. Matla bakeng sa ho anetsa Evangeli.

- 1) Hona le **Dunamis** bakeng sa ho bolela evangeli (Lik 4:33).
- 2) Hona le **Dunamis** bakeng sa ho fetola batho libeng tsa bona (Luk 1:17).
- 3) Hona le **Dunamis** bakeng sa ho sokollela batho **ho** Molimo (Bar 1:15, 16).
- 4) Hona le **Dunamis** bakeng sa mats'olo a borumuoa.
 - a) Testamenteng ea Khale (sheba moelelo oa Bar 9:17).
 - b) Testamenteng e Ncha (sheba moelelo oa borumuoa ho Bar 15:19).
 - c) Bakeng sa balumeli bohle (Lik 1:8).
- 5) Hona le **Dunamis (meeka le mehlolo)** ho netefatsa boleng le evangeli ea Jesu (Lik 2:22 le Mar 16:20).

e. Matla bakeng sa ho haha Kereke.

- 1) **Dunamis** ho hlomella Kereke.
 - a) Sheba lisupo tsa kereke tse bonoang papisong ea litalenta.
 - b) **Dunamis** e tolokoa e le **bokhoni ho** Math 25:15.
 - c) Papiso ena e amana le ts'ebeliso le katiso ea lineo.

Ntlha ea Puisano

Bua ka ntlha ena o ipapisitse le katiso e fumanoang ho Bae 4: 11, 12.

- 2) **Dunamis** ho holisa kereke le molumeli ka mong (bala Bak 1:28, 29).

Notes —

MOEA O HALALELANG

Ntlha ea Puisano

Notes —

Bua ka ntlha ena o ipapisitse le taba o fumanoang ho Bae 4:11-13.

f. Matla bakeng sa ho etsa mosebetsi oa Molimo.

1) **Dunamis** bakeng sa ho khalema (1 Bakr 5:4).

2) **Dunamis (bokhoni)** bakeng sa ho fana (2 Bakr 8:3).

3) **Dunamis** bakeng sa ho etsa mehlolo.

a) Mosebetsing oa Jesu (Luk 19:37). Hlokomela, **Dunamis** e tolokoa e le **mehlolo**.

b) Mosebetsing oa Setefane (Lik 6:8).

c) Ka kakaretso (1 Bakr 12:10). Hlokomela, **Dunamis** e tolokoa e le **mehlolo**.)

4) **Dunamis** bakeng sa ho leleka mademona.

a) Mosebetsing oa Jesu (Luk 4:36).

b) Mosebetsing oa Barutuo ba Hae (Luk 10:19; 9:1; Lik 19:11,12).

3. Qetello.

a. Matla aa a qhomisang ke eng?

1) A bakeng sa li-pheo tsohle tse ka holimo le ho feta moo haholo (2 Petr 1:2, 3). Ka holimo ho tsohle, mabaka oohle, a bakeng sa khanya ea Jesu (2 Bathes 1:11, 12).

2) Matla ana a lokela ho ba joaloka lets'oao le lulang le supa ho Jesu. Hona ke 'nete kaha matla a hokahanyoa le Moea o Halalelang, 'me Moea o Halalelang Eena o lula a supa Jesu.

MOEA O HALALELANG

b. Matla aa a ho kae?

1) A lebitsong la Jesu (Mar 16:17, 18).

2) Kahoo, a ho shoeng ha bo-rona kaha ha motho a le ho Jesu,
o tlameha ho shoa bo-cena.

c. Re lokela ho lumella Moea o Halalelang ho re tlatsa ka
Dunamis hape le hape le hape!

Notes —

MOEA O HALALELANG

Notes

Tse qetellang

¹J. Rodman Williams, The Holy Spirit: Presence and Power - class notes from Regent University course (Virginia Beach, VA: CBN University Media Center, 1986). The flow of the major points of the outline of this part of the course are adapted directly from the teachings of Dr. Williams. Used by permission.